

四庫全書

集部

欽定四庫全書

因園集卷十一

左贊善趙執信撰

迴颿集

將之江寧與南村聯舟暮發

卷冬十二日

三年潛菰蘆每出昧所往揚舲無遠近都未愜夢想今  
朝偕舊侶忽欲成北上歸計尚迷漫客心且浩蕩波寒  
山啓途日落風送響篷底對微醺笑言聽盪漿

曉過惠山口號示兒慶

此行將爲之婚

陽烏棲柁送江關坐爾萍流老未閒貌我龍鍾入寒日  
荒烟落木九龍山

奔牛遇雪呈南村

交期垂盡整同舟八口飄零感未休一瞬南來還北去  
三年風雪度奔牛

將至鎮江漕艘壅塞河淺不可以前南村由丹徒  
開覓江舟余以肩輿山行兒子騎驢從之是

日大風寒止江口觀音庵

寒潮夜上二十里萬槳交爭三尺水舴艋失勢涸轍鮒  
籃筍多情躍冰鯉故人寸步依江南死守窮波遲挂帆  
稚子衝風行不顧揮鞭導我緣山去盤迴聲磬陟層巔  
恍忽思歸夢中路青松離離映城堞江色空明與山接  
問君拔腳歷千尋何似低頭藏一葉信穿闌闌臨江頭  
僧房茗粥能邀留却憐比日同誦唱復作東西遠相望

夜宿觀音庵不寐

長宵風逼劇寒生引盡深杯醉故輕雪色侵龕燈半壁  
江聲撼夢月三更未成洗鉢金山寺翻遣聞雞鐵甕城  
爲報僧雛催曉梵暮年心地聽教清

明日買棹南村昏暮亦至東夜遂濟江

待君終日坐心與水滌迴大舶凌風至高帆冒夜開乘  
槎近星月破浪入雲雷却訝剡溪棹携將安道來

曉大雪順風張帆行大江中竟日日暮抵觀音

門外

海雲祕日朝光黥潮擁江迴水西走浮玉便娟尚趁人  
鍾阜英靈已招手篙師捩柁與寒爭風伯催帆向空守  
雪花有意紛斜來助我推蓬喚沽酒兩山夾岸獻瓊瑤  
萬里平波粲星斗葭蘆影亂渚烟空鳬雁聲多凍雲厚  
是時舟中心目開共說平生未曾有太行峻聳坤輿脊  
田盤幽探滄海口曾經積雪徧峯巒未免遊蹤倦培塿  
何如坐卧恣中流賞麗揆竒在襟肘不愁短晷失奄忽  
頓覺長江吞八九幕府山頭落晚鐘廿年頗憶曾來否

題燕子磯

凌波掠雪似飛飛，千古長巢在翠微。  
桁斷何由半朱雀，巷深底處覓烏衣。  
江山社換無來去，宮殿春殘有是非。  
贏得扁舟南北客，風高日落鎮相依。

寄寓朝天宮飛霞閣

殘冬日月忽闌珊，暫託仙居夢亦閒。  
愛向飛霞啓東牖，半城晴雪映鍾山。

新春獨遊莫愁湖上望石頭

殷勤江南春慰我遠爲客東風引遊心忽落城西陌湖  
光漾微晴山意動新碧偶逢亭榭連遙喜舳艫隔岸柳  
替未舒水烟澹逾積飄蕩兩蜻蛉凋殘幾家國地形長  
虎踞鼎兆屢龜坼我我帝王業瓦石同狼藉天子與佳  
人俱供後歎息兵戈或取快粉黛乃增惜宴坐歌無愁  
酒徒信良畫跂足傍魚庵沙禽飛格磔

南村將携家附漕艘北返見邀小飲話別贈之

十六韻



擬作餘生別重論半世交盟心渺京邑揮手黥江郊往  
事蕉覆鹿浮名星繫匏蜂遊千畝失蝸鬪一官拋花月  
迷牀第金蘭誤斗筭自矜身皎皎人怪氣恹恹粵嶠懸  
輿誦吳閭集客嘲藏拏輕鼠穴避地愛鳩巢有意營三  
窟無師禦二嶠羊公慙舞鶴周子耐潛蛟老飲情偏減  
窮吟體更拗仙期耽鍊石妄夢泥觀爻故國虛風木他  
鄉戀畫橈真成魚在釜始見芥辭坳冉冉分南北匆匆  
對酒看臨岐翻贈策爲我挂船艎

晚行句容道中見月

寒靄澹平川，松風散暮烟。  
江迴天北望，月試歲初圓。  
病，青陽外行藏句曲前。  
歸程任顛倒，客舍待團圓。

行次丹陽登舟口號二絕句示慶

野曠日瞳瞳，輕塵撲袂紅。  
蹇驢渾不進，應是打頭風。  
歸夢迷揮策，連宵屬岱雲。  
吳歛轉柔櫓，重向月中聞。

上元前夕却歸寓舍

紅蘭燈火遞相催，白板林扉久始開。  
船尾潛移春澹沲，

樓頭高引月徘徊情牽五嶽婚還嫁興盡三江去又來  
且與妻拏話風雪屠蘓遙接歲除杯

虎邱玉蘭傳是齊梁間物

春風不戀梵王家繡嶺荒涼紺殿斜西望六朝文物在  
辛夷間放最高花

門外菜花大放

日倚閒門對野塘愛看十頃菜花黃柳因烟讓分明色  
麥向風偷散漫香夜半霏微經好雨溪頭平遠放斜陽

春來每載兼旬酒擬換他鄉作醉鄉

爲菜花語風神

寄謝封家十八姨三春二已不多時黃金狼藉那收得  
莫倚顛狂抵死吹

何樊圃携慶自西山返各述所歷因憶湖山舊  
遊

昔我遊石湖月滿秋水盛湖影與蟾光天地兩明鏡旋  
舡入支硎黃葉糝幽徑戛石一枝筇穿雲數聲磬斯時

饒勝情亦復能濟勝坐使具區涯羣山期涖盟春帆挂  
濃雨風力因寒勁一瞬失靈巖吳宮莽寥夙未追朱公  
泛且得鄧尉迎晚霽虎山橋湖山動晶瑩月上縹緲峯  
迴與西崦映却笑西子湖近人如妾媵晴光曉斂灑香  
氣日奔迸一昔四十里梅花漫林垞外拔峯巖周中積  
玉雪騰三萬六千頃晃朗欲相競平生登覽懷爛漫茲  
遊罄歸路穹窿顛曠輿皆逕庭憶從鳥還巢翻覺獸在  
穿重來足滯留欲出奈羸病譬如今年舟水落不可榜

四度過花時三生罷佳興君能抵掌談兒學擁鼻詠馳  
想踞繩牀烟嵐滿清聽

諸葛菜

半庭紫豔映青苔丞相軍中舊種來千古英雄羨名士  
並時讎敵歎奇才星沉陣石闌江列春聚營花匝地開  
爲問鄴都并洛下荒榛殘甓不堪哀

暮春送仲生偕虔遊虞山

吳地春事喧今年減大半偶因長官嚴頓覺風流變香

花冷僧寮裾屐空仙觀寥落千人石笙歌付夢幻支硎  
松篁叢禽鳥樂相喚嬌女紅閨啼長年畫舫怨疇昔尋  
春人扁戶亦愁歎始憐韻士懷非爲幽境戀小兒好事  
日日聒山水縣熟知乃公意常在破龍澗吾子滄海期  
已寄徂徠畔未免故鄉心臨行彌繾綣似聞簫鼓聲不  
畏旌門遠放櫂及佳時巖花正凌亂

贈山陽程遠復

程生意氣傾四海騎虎攀龍一身在半生賓客散如雲

可憐誰繡平原君黃金百萬隨手盡猶倚雄豪不解貧  
前年酌我澠水上一石鯨吞不相讓今年過我闔廬城  
笑談欲盡今古情丈夫方寸納五嶽那得人間無不平  
我行雖迫白日暮西望槃散作徐步閨風縹緲弱水深  
想像飈車引前路君才與年俱莫當且復歛穎囊中藏  
斗牛紫氣常浮動定有張雷識劍光

池上歸興四首

三年池上劬蕭萊手種荷花今再開老柳久拋青眼送



故山屢趣白頭回杜陵潭北終須去庾信江南劇可哀  
未免違他慈氏戒連宵桑下苦低徊

郊居風味賦來真不道元非土著身盡室兒童音語換  
比鄰雞狗應聲馴門當秔稻闌晴雨溪有魚蝦結主賓  
莫待秋風剛舍去紫菱紅芡倍留人

經年坐卧小樓中日夕搗頤望不同亂灑松聲楓葉雨  
平翻麥浪菜花風池光浸牖天如鏡林影穿帷月似弓  
最是勾留魂夢在畫船居岸桂成叢

卜築初心擬隱淪  
投林揮手莫逡巡  
漂搖屋宇慙新主  
老大文章想替人  
遠海忽傳珠徙日  
高梧長憶鳳棲晨  
書窗映竹題詩處  
未必官奴與掃塵

歸舟

望齊門外望青州  
一室歡聲入棹謳  
十幅風帆半城月  
最難圖畫是歸舟

是夕泊胥江

茶竈餘溫尚未休  
全家已到水西頭  
胥江舊是關情地

來即盤桓去却留

舟中題別四首

移家行不易猶傍越來溪但道興亡忽難將去住齊舊  
交知落落前路覺淒淒曉月偏無賴拋人獨向西

頻年居北郭豈是卜南村唱和無一友招邀能幾門程  
書困毛穎止酒病文園此際成追憶中懷已不存

遠聞吳季子高義至今空自許言辭熟相矜酒肉工情  
輸船尾柁事繫渡頭風道是華胥國元來一夢中

久住我自厭將行人罕知黃金憐汨沒青翰喜推移地  
豈千年改才應二陸遺如何相送處不見一篇詩

風雨早發呈同舟何翁

南風稔識客心懸曙色沉沉促放船川漲十分挾梅雨  
山光一帶蕩菰烟城闌好憶遼東鶴津路閒論絳縣年  
誰似洛中諸好事解呼李郭作神仙

行次樂社念颶雨兒却從後至蓋自故鄉來迓  
亦以雨夜泊湖墅舟相近而不知也

濕雲初散蘭陵道乾鵲登桅喚清曉舟人息撐理帆蒲  
歸客憑舷玩烟草忽從遠岸聞招呼急足追奔似飛鳥  
迴看一艇三數人半翳低蓬難了了須臾二子過船來  
相與喜笑還驚猜中途寄語教坐待何事怱怱輕往迴  
答言小向揚州住眼見長江心欲渡朝朝倚柁問篙師  
夜夜懸燈認津樹昨日晨過吳市門婦孺皆言已歸去  
却憑關吏指分明宛在前宵同泊處是時大雨如翻盆  
船船相並不相聞詎知岐路生夢寐一寸波光萬里分

老夫垂頭長太息由來物理無窮極天地山川反覆時  
父子當前不能識何況悠悠世上情空馳南北勞吾生  
正逢午霽解維好互語家園我卧聽

雨泊京口驛去端陽數日矣

江頭繫纜坐清深愛聽潮聲厭市音酒自六朝何薄薄  
雨經三日故情惜空餘滄海乘桴興無復春波接葉心  
聞道魚龍嬉戲絕金焦晴色尚堪尋

仲生及三兒子冒雨登金山

江山日無事雨中山有情行教鷗鳥引身落畫圖輕攀  
塔呼羲御巡欄歷化城僧寮憑寄問經歲幾逢迎

細雨渡江

江雨已無時歸心坐汗漫移舟方暝陰鼓柁遂平旦風  
威乍衰歇潮勢小凌亂放目極東溟収神投北岸往來  
三十年自許知津慣詎料大江中脩途有遷變疇昔譚  
家洲雲樹浩沃衍上天下息壤橫割中流半西來萬里  
波迫蹙強迴旋金山復後逼對壘日挑戰蛟龍束約中

盤礴每騰竄行舟出其間紆折避湍悍長年互手語過  
客疑夢幻矯首望名藍蜃市忽隱見近知陽侯意擬使  
桑田換水弱能侵蝕地久易渙散俄然失洲渚不假走  
雷電潮濤如鼓舞魚龍亦矜炫直馳赴海門千里一飛  
箭平平揚子渡去險就清宴浮玉倍分明金碧堆素練  
何人解鄉道路繞三山面帆搖塔影迷棹戛闌干徧列  
牖與篷窗相依乍宛轉我時臨船舷婦子同賞歎昔來  
所指似今者充近玩兼存溯游興不苦攀躋倦江山具



賓主烟雨荷祖餞勝境况別闌離情彌眷戀歸語曾遊  
人南風起遙羨

端午抵揚州假寓於使院之前嵯賈之館頗寬  
潔有竹數十竿

圖歸觸炎暑中路仍滯留就喧與居卑豈復郊原幽蕪  
城百萬家皋廡不可求江山一區隔花月千載羞猶喜  
嵯使者避我停真州門前荒草積日夕鼓吹休紛飛附  
臭蠅奔散當車牛遺此虛閒館可以坐待秋庭前有此

君風雨相綢繆主人不願識聊比王子猷

亡友王義文之子携酒見過

眼中磊落見王郎地下交遊失老蒼離合栖栖徧南北  
往來冉冉判存亡素琴挂壁空留水長笛臨風易夕陽  
強作清談不成醉甘年前是此蒲觴

初訂交以  
庚辰五月

王竹村招飲北郭園亭

幽徑萬琅玕森沉夏欲寒酒人愛亭館詩客賞林巒畫  
舫清池外紅橋綠樹端斜陽連北郭金碧一橫看

有以詩卷見遺者自題曰江南某戲成絕句

黃金白雪本岐途  
濫耳何人解聽竽  
自許周郎擅江左  
不知消得小喬無

送寄程遠復江寧

閒把松枝坐竹風  
道林蕉萃罷談空  
如何一片韓陵石

遠在雨苔烟草中

李山甫詩雨苔  
烟草石城秋

題王鍊師潮上新居

師能醫與余  
有山中之約

萬頃波光裏  
平添屋一區  
焦庵惟結草  
董杏偶論株  
飢

鳳下依竹蟄龍深養珠太山阿閣在莫只戀孤蘆

遠復自江寧來見邀城東吳氏園賞桂花

出郭野望遠到門秋樹深相將轉幽徑何處慕遙岑香  
向小庭發人因佳霽尋微風散杯竿斜日襲衣襟競作  
詩騷語難通醉飽心鍾期江上至使我愛橫琴

憚氏園

梧陰竹徑積苔痕石壓闌干水浸門二十年來盛衰事  
試憑遊客問名園

戲題王九蓮莊詩卷因呈其兄竹村

並賞分評何所似天台連接赤城霞  
輞川漫著裴居士  
相國元來大作家

重九前得家書知懿妻亡因遣其以車重先返  
使爾先歸我後期蓬蓬南北本難知己甘半了餘生債  
何意平添久客悲下澤車輕載書牘稠桑店僻覓程遲  
可能里舍初還日剛及天涯好去時

廣陵湖

錢塘八月湖如雪月滿風高更奇絕無緣却到廣陵城  
羅剎難移吼怒聲漢代枚生妙騷賦指點王家舊封處  
千年文事不分明競倚邗江咏秋暮驕龍昨夜吞五湖  
茫茫海底沉陶朱驚濤真入揚州郭一舸空悲文大夫

### 寒雨移居

北風吹雨如亂麻還家客子遠移家不嫌觸事得瑣碎  
但願隨地無諠譁巷狹蕪間絕冷僻屋稀正喜非新華  
輿僕暮行郭索蠶妻拏寒入盤屈蛇樓頭可以見帆檣

戶外亦復賣魚蝦鄰無卜處謝王翰酒有載者充侯芭  
行藏斟酌漸解穉歲月參差屢及瓜更餘一遷向何許  
冰雪湖隄薄笨車

留別遠復卧病

卯酒驚黃夜蠟紅留連話別未惓惓驚心歸客成衰久  
回首情交在病中入舍空多彈鋏士同車無復抱關翁  
相思此後腸何似汶水千迴却向東

召伯鎮別王鍊師

趣途辭水宿蘆舍訝初暝強偕僕園情未適麋鹿性故  
人携酒來清言引幽聽魚罾帶月供馬策臨墟贈道心  
綠時深塵慮入山定莫負春風期爲君掃松徑

淮安客舍題感

伏波慣作賈胡留偏向山陽一夕休長老無緣重問訊  
少年何必共言愁凋空桃李松應凜食到魚蝦虎亦羞  
况復歸心似清濟寒烟一道貫河流

郟城道中



炊烟慈翠逼寒新  
傾蓋亭前憇馬茵  
遺老含悽說生事  
今年餅餌屬行人

山行遥寄何翁

畸士仙蹤未易攀  
寧人好語且須刪  
怪來郭璞藏身地  
只是因依浮玉山

大雪過十八里嶺

嶺半下見  
新泰縣

羣山如故人走遶  
二百里風雪亦有情  
掀飛作狂喜  
整峯後依依寒翠入  
我指曉與驛塵辭  
幽意引行李初尋

困梯攀前壁得遷迤僕夫愁厓谷客興起泥滓西望秦  
山雲冥濛擁雄峙近臨稍開豁烟火見叢爾一身蹉跎  
餘萬象迷漫裏盟心謝英靈終焉託畏壘

顏莊即目

溪水彎環落雪痕亂山高下盡當門漁舟添箇溪頭纜  
便是江南黃葉村

村宿嘗新釀調仲生

比年對飲杯在手只憶家山寒夜酒今宵與子細細斟

頗謂老夫失言否京口百花香透瞿南潯澹泊秋露清  
酒人猶自意索莫但覺平原醉不成何如雪後開新甕  
金粟晶晶點霜重竹爐煎出寒作輕玉盃盛來空不動  
口辛喉滑到臍甘倉猝滿引能微酣從此桓公老從事  
應傳別譜過江南


河莊戲題

欲知太行推車道扶羊嶺頭雪初曉欲知蜀棧天低路  
青石關前冬已暮深山犯難誰相從吳兒使馬如擾龍

不如倚枕聽歌好溜水塵沙愁殺儂

問弟姪兒孫來迎者

憐余爲客久迎勞見情親忽憶前相送而今減幾人



因園集卷十一

欽定四庫全書

集部

因園集卷十二

詳校官左中允<sub>臣</sub>瑋五珠

助教<sub>臣</sub>常循覆勘

總校官進士<sub>臣</sub>朱鈴

校對官編修<sub>臣</sub>方燁

謄錄監生<sub>臣</sub>李茗

欽定四庫全書

因園集卷十二

左贊善趙執信撰

懷舊集

雨中得大木遺詩題感因懷平生故人

素士慙知己衰年感同心  
惻惻如見夢惻惻還聽琴  
戶外波蕩滴庭中山嶽崙綿邈三十載  
空天落遺音向夕微雨過悲風生  
竹林當時文酒侶滿目成飄沉  
嵒調恍

一接阮樽誰復斟浩然望雲海獨發懷仙吟

懷舊詩十首人各一小傳以相識之歲月爲先

後爾

淄川畢世持公權少有雋才康熙戊午鄉書山左  
之文冠天下公權爲首舉余次之齊名相善後三  
上春官不見取其文清深幽異俗流淺識莫能窺  
也由是憤鬱遂卒年不滿四十余仲子懋婚其小  
女頗知爲文年二十有八暴死女亦旋亡



城西闕閱才筆力追大雅三十作解頭一朝名天下側  
身睨青雲引手攀金馬詎意商羽音知希和彌寡卞玉  
三不售顏年終莫假寂莫長白楊斯文棄荒野我有早  
慧兒衆譽期終賈遭逢未清水凋謝亦飄瓦長憶初韻  
頑肺肝共傾寫殘年西河淚獨爲離羣灑

常熟陶元淳子師戊午之秋從翁司寇來濟南與  
公權及余結交明年余留京師晨夕無間鈍吟先  
生遺書子師先得之轉以付余且爲賞析由是得

肆其力於詩與書法子師以文自豪名日以高性  
岸異自余而外無所推許時輩咸以爲狂年四十  
始成名詘爲縣令得海南之昌化以儒術爲治對  
上官無所降屈爲民除積逋著爲書指畫痛切竟  
卒於官

憶於舞象年出交天下士得識元紫芝以免濁世恥入  
朝偶見容疎放每自喜推轂入高流非君復誰恃既傳  
碧雲學砥礪日靡已謬竊當代名芽蘖從茲始狂聲相

傾動貴勢每切齒名成身見排  
萬里落僭耳結束萬古  
心勞勞向赤子能令野雉馴  
不畏蒼鷹視觸忌恤民依  
涕洟託空紙我曾覽遺編  
朗抱長沙似乃使如斯人沉  
淪瘴海死

德州馮廷樞大木亦鄉同年也  
壬戌榜進士明年  
授中書詩才清拔恒與余唱和  
並以諸葛銅鼓詩  
得名阮翁稱曰二妙大木始漸  
於其里中及新城  
之習詩惟主新異疏闊唐賢後  
於余所聞馮氏學

又熟讀太白集久之自能成就章句與風雅相出入矣然鮮妍修飾未遂忘也官十年不進後將遷儀曹主事未拜職一昔無疾卒於寓舍

獨立諸生中才名海岱盛一出賦雪車詩豪敵盧孟時世相波靡唐風方不競各弄姿貌妍爭盤言語硬君故優爲之國色新妝靚聞道厭紛華收心歸雅正壯遊涉江漢力可排茅勁幽意屬郊居義能無比興偶以餘勇賈輒獲偏師勝遂使老涪翁絕倒爲恭敬惜哉僅中壽

宵寐溘不醒豈復玉樓成赤虬閣要請更令假數年風  
格冰雪淨並世見桓文中原誰主盟

滄州劉果實提因與余同康熙己未榜榜下相見  
長余四歲後同入翰林相於如同氣居數月假歸  
甲子授編修明年被調去遂不出提因貌白皙秀  
異行動如鶴坐必跏趺幼精內典其於世味了無  
所繫戀三十喪妻竟不復娶意其前身蓋高僧也  
詩文恢詭雄辯非薄迂儒不可以法度求之余於

甲申冬過其家出滄酒共飲詞色古淡使人意消  
余甚媿之近聞尚無恙

條然野鶴姿不著世塵垢借問何處來夕陽一回首三  
年出遊戲璞玉偶然剖畢世歸沉冥落月不可取拂衣  
尚朱顏扁戶遂黃耆隱居大小間道在夷憲後昔傍集  
靈臺歲星暈爲友近訪華陽洞壺公沃以酒嘲弄人盡  
亡酣放吾何有相待淨居天無顏開笑口

聞喜張克嶷拗齋自三榜入詞館無一不於余同

後改官主事累遷郎中出守廣西平樂再守廣東  
潮州奉諱返里竟不復起其在潮也每對酒即憶  
余常至隕涕大醉輒呼余字曰何不來乎痛哭久  
之既而果至傾囊解贈無難色蓋其性抗典無城  
府與余一致故投契獨深也然不能事上官意有  
不合或面詬之而清惠得民其賢者每相調護精  
時藝於詩洞識佳否而曰吾不精則不爲也年垂  
八十乃卒

太行限東西上有九折坂我腸亦如之盤迴更無算比  
聞君亡日墳土嗟已曠其時我滯吳天長夢魂短君昔  
臨南溟怪我行何緩積歲守鄉園病深往來嬾緬懷鯉  
溪旁花月麗高館遊蹤牛斗賒歸橐象犀滿朋交今所  
輕高義古亦罕悵斷買青山葱葱長在眼

諸城李澄中漁村少爲名諸生其始生也父夢李  
攀龍入室既長能詩仍效攀龍體而差安帖矣以  
薦入翰林於時宋元風氣方煽漁村獨守其故步



然學識日進彌擴而清之作者不能薄也文格下  
於詩二者皆謬以推余曾值余觀宋史謂曰此書  
須大手筆更修之非君家事歟余辭以官况迫窘  
力不能獨舉恐中廢時漁村方撰五嶽志採摭甚  
勤竟不克就如余言與余同被論獨得解歷遷至  
侍講左調歸年六十餘矣未幾卒

東武利達區君獨超以靜讀書九仙顛縱目三山影前  
身白雪翁蛻化失簾獮子虛賦未成得意薦已幸史筆

從委積詩篇浸清整與我分最深先後落機穽館閣崇  
聲華吳越積假請北士才天然空踈勢難並忽於羣木  
中千丈見孤挺垂頭讓英盼側目忌高騁玉顏奚足恃  
圖畫變俄頃紫府祕瑤籤容君終主領

蒲州吳雯蓮洋拙於時藝困躋場屋中體貌粗醜  
衣冠垢敝或經歲不盥浴人咸笑之而詩才特超  
妙余嘗比之溫飛卿云與漁村同薦既試報罷其  
父故與阮翁同年始入都以詩投謁阮翁心折極

口爲延譽而其性迂僻寡合遂淪棄終身與余甫  
一見如舊相識余好用馮氏法攻人之短惟蓮洋  
不以爲忤其作字用馮法粗知間架然不能工也  
晚相值於津門出詩卷見示曰曩之所攻悉刪改  
矣乃知其非名輩所及也屬余論定余請俟異日  
蓋其時正逢阮翁之怒不敢闢入詩壇故耳又數  
年蓮洋卒於家卒後其集聞送新城阮翁爲作墓  
誌且刪定其集迄今將二十年矣而未行於世意

其時阮翁老而多忘未幾遂亡未及歸諸吳氏耶  
若然池北藏書散失殆盡蓮洋集從可知矣

築室中條山招手玉女峯黃河遶門前滌盪萬古冑埋  
頭試牘中啼號羞秋蟲風騷適榛蕪揮刃侔神工脫棄  
范陸習踐履岑高蹤貌似溫方城才與遇並同詩老性  
護前於君禮獨隆貴遊負販豪交臂來趨風聲名天可  
假時命人能窮濩落王官谷穿冢連司空遺文寄池北  
飄散隨萍蓬追維平生言使我心忡忡虛疑玉溪底匣

劍藏芙蓉終當沉鐵網大索蛟龍宮

王官谷玉溪皆在中條

錢塘洪昇昉思故名族遭患難携家居長安中殊有學識其詩引繩切墨不順時趨雖及阮翁之門而意見多不合朝貴亦輕之鮮與往還才力本弱篇幅窘狹斤斤自喜而已見余詩大驚服遂求爲友久之以填詞顯頗依傍前人其音律諧適利於歌喉最後爲長生殿傳奇甚有名余實助成之不時唱演觀者如雲而言者獨劾余余至考功一身

任之禱還田里坐客皆得免昉思亦被逐歸前難  
旋釋反得安便余遊吳越間兩見之情好如故後  
聞其飲郭外客舟中醉後失足墜水溺而死

每笑蘇子美終身惟一蹶永拋夢華塵長嘯滄浪月千  
秋覓同調舍我更何人高騫雲中鶴俯視爨下薪當時  
共造迷鬼神實假手委曲以相成君無道慙負羣兒旁  
快意一網盡無餘借問即陸者誰能免淪胥弔君水仙  
操置我愚公谷得失物難蟲死生身翻覆歌場倏已散

此是無色天翩然成獨徃直上三神山

長洲顧以安小謝少有才辨能爲捍闔言不屑塲  
屋遊南北大吏間爲幕客稍不合即捨去潛習禪  
觀其詩以妙悟入頗尚比興中歲貧甚來長安依  
其姪以居姪在翰林中粗有文藻小謝視其詩輒  
唾罵且曰爾曹安得有識字者其姪病之徧索有  
時名者之作咸罵如前雖阮公亦不能免最後見  
余詩於他所擊節歎賞歸而笑其姪曰僅一人而

爾又不解奈何遂來締交後其姪以憂去小謝從  
河上入都囊無一錢余適亦被放過慰余了無困  
苦之色展轉借貫不復離輦下居數年忽携十萬  
金歸吳買田宅構池亭儼然素封厚遺故舊恤貧  
乏通賓客人莫之測也余客吳門必主其家小謝  
亡家亦盡矣

中吳信繁侈獨恨人士少文章與意氣一風可盡掃况  
欲二者兼何殊來鳳鳥天生未易才舒卷形象表論詩



如談禪半偈宗旨了取金如承蜩外府皆吾寶笑罵今  
鄒枚不畏公卿惱百倍陸賈裝挈歸一腐草宅嫌金谷  
奢洲引石魚小英彥聚紛紛窮交愛擾擾同舟憶微言  
高視凌穹昊方期彌勒龕豈羨蓬萊島離居我自憎乘  
化君何早寄謝闔閭城努力事醉飽

餘懷一首

東阿房嵩申公長清于紹舜毅齋並余三榜同年  
申公孝友大節余前為之傳並記其白晝見夢事

穀齋一仕輒退終樂田園今尚健在頗有書來往  
山陽程光奎遠復豪俠丈夫誤結憲網百萬之貲  
一朝蕩盡壯歲而亡於余有恩故不欲敘述之爾  
舍人高獨行史傳餘欽仰精神貫良朋停午發夢想于  
公恣閒放非隱亦非仕生存天地間碩果我與爾程生  
今嘗陵下視朱與郭失足散黃金收身投碧落眼中磊  
落人歷歷五十年崩奔避三事牽率歸九泉古來成大  
名奚必懷高位揚袂指層霄泠泠起長喟



因園集卷十二

欽定四庫全書

因園集卷十三

左贊善趙執信撰

礪庵集

望春曲

歲已換春不來所見惟冰雪日夕增皚皚春未來冬且  
久寒威爾何苦勸爾一杯酒天地本無私盈虛合有時  
但臨碧池待莫怨惠風遲

有感二絕句

漫天飛絮落泥塗或化流萍水一隅  
騰向魚蝦矜覆載不知記得本根無

東君劇戲喚春迴  
販弄羣花處處開  
一種風吹偶先後  
却教山杏妬江梅

題銜月亭

高亭盡道與閒宜  
對雪當風酒共持  
輸與山翁自怡悅  
憑闌月月月明時

晦日大雪與仲生及子弟開南窗暢飲成雜言  
學歐蘇禁體

閒居每愛雪助我園林幽去冬圍火坐寒意時侵裘簾  
隙試微瞰僅能沒瓦溝今晨偶偕二三子林下共語春  
和柔颿然霰先集大至風莫收驚塵有猛氣濺沫無平  
流驅迫入深屋各聳山肩頭衆情殊不厭撒墮呼觥籌  
惟有杜康劉白墮解與滕六除怨聲平離南窗騁望得快  
意奇絕非可人間求羣峰晃朗相烘染萬樹匝匝爭雕

鍤石路自覆荒穢淨池藻細呈青翠稠中流澹搖漾恍  
棹山陰舟孤亭炫突兀新成天上樓神山仙闕暫飛落  
但恐不爲東皇留當杯吟賞還儂事無使謝庭兒女羞  
猶勝令節對芳宴夜珠明月乘昏投長宵紅燭照白戰  
酒行與雪俱無休

春如冬詩十二韻

今春多雪少晴二月初旬雁猶南去

擬將時序問天公半覺青春度若空斗柄指來元的的  
羲輪行處太恩恩年光飄忽隨流水氣候回環象引弓



暘谷詎應長避地寒門猶道未成功盡收川嶽凋殘色  
散入乾坤慘淡中有信風花翻瑟縮無情雪月鎮朦朧  
氷山浸失支撐壯玉琯難求變理工北戶摧藏何振螫  
南雲零落尚征鴻豺狼躑躅噪溪黑兒女悲啼望曉紅  
深巷袁公耐枯槁敝裘晏子愛蒙茸竹爐火足能偷煖  
瓦缶醪香欲送窮却怪詩人綠底事雙垂冷淚向和風

嘲近春花

黃金偷色未分明梅傲清香菊讓榮依舊春寒苦憔悴

向風却是最先迎

山半花樹移就小池北栽之

地高苦風多山盡得日暖主人與春閒幽事觸何限荒  
園有花樹託根半巉巖寒威易侵陵土脉况踈散滋分  
雨雪輕氣受天地淺秋葉早投地春花稀入眼對之喻  
懷抱終歲鬱不展寧辭就卑遷何處覓餘堧近於小沼  
北撤屋出平坦未勝數弓量猶愈一席卷通流初徧潤  
除石漸成窾老夫獨指揮童子競往返朝至日中昃柯

條坐來滿連朝晴和意有似故繾綣何以答恩私爭妍  
不容緩穠華衆所欣細葉我勿翦舉頭見嶮巖屏跡恣  
偃蹇且待綠陰繁時時來洗琰

栽杜擬以接梨

春風暫爲護根芽池影先容細碎花好待他年落香雪  
垂垂玉乳滿貧家

栽櫬

詩疏云官園種  
之謂之萬歲

幽巖遠去劖雲移爲愛蘭芬與雪姿莫向官園爭物色

深山始有萬年枝

大風惜玉蘭花

池烟徑柳漫黃埃苦爲辛夷醉一杯如此高花白於雪  
年年偏是關風開

山徑爲塵土所埋擬疏出之

三年修葺因園居造舟移亭風景殊豈免土木有委積  
塵灰瓦礫纏山隅清池倒影見曲折層厓幽澗愁糝糊  
南州高士慣洒掃此事詎可期僮奴北風昨夜狂而急

茅捲石奔水飛立掩關塞耳意欣然將謂林巖淨如拭  
寧知埋沒轉更多驕龍挾雨慵經過自知三徑秀而野  
奈此枯烟暗月何褊心忽發藍田叟盡喚鄉鄰沃以酒  
撈山先事劇荆管一日縛成三百帚

暮春晦日族弟邀往山村看桃花偕諸叔登高  
小飲二首

閒與病相守山情猶尚存桃花半開地春雨乍霑村隨  
水頻紆徑緣厓自識門携筇如擁棹重入武陵源

高岡出花頂坐處欲千尋風起香偏遠烟過色更深春  
山世人面西日老年心往事銜杯說兒童莫厭斟

即事示子弟

虛閣踈林視聽清連朝偏是暢幽情牆頭柳色和山色  
池畔書聲亂水聲於世偶然寧復避此中有底尚難平  
因憐獨樂名園者却恐同心積漸生

宋孫二翁見過

閒居所喜在無喧日日支離學灌園已送三春如過客

爲迎二老忽開門  
風花奄冉成黃葉  
霜鬢婆娑映綠樽  
四海經遊總陳迹  
不堪倚醉一追論

芍藥

閱盡繁華委地空  
獨將姿格領薰風  
已拚富貴藩籬外  
漸入烟霞仿像中  
水畔叢深驚洛艷  
雨餘香重厭春工  
一從品作姑山雪  
悔向揚州識相公

東坡玉盤盂詩姑山親見雪肌膚

重題芍藥

醞釀春光故放遲  
清和不失畫欄期  
濃香擁徑風微散

艷色翻堦日半欺  
士女有懷充報贈  
君王無分領歌詞  
壺公偏解相料理  
手植靈根近上池

遣興二首

草色斜侵磴道齊  
短筇長晝足攀躋  
清風發自小池上  
紅日移於深樹西  
暗水簷楹隨宛轉  
遙峯屐齒互高低  
仙源黃髮閒相笑  
前度漁人到已迷

心跡孤高寄草亭  
昨宵新雨洗巖扃  
林風急處水爭響  
壠麥黃邊山倍青  
時勢空華隨現滅  
勞思天地竟清寧



閒披書帙相關者祇有浮邱相鶴經

悲小女

十載癡龍抱裏珠由來憐愛與悲俱偏工吳語從慈母  
苦誦唐詩向老夫昨過碧池猶弄水那教黃土便埋軀  
欲知學道忘情未曉枕無眠有嘆吁

即日

北窗坐長晝晴雨倏難分林影有無變溪聲高下聞山  
深應隱日囊溫豈容雲解識天無定心依止觀文

池荷五月已花是九家弟盆池中物去秋八月  
取之沉諸水而破其盆今年計可大盛報家弟  
訂飲賞之約

園亭水木久益佳自矜不數吳中家南頭池方一百步  
其中詎可無荷花去歲經營殊草草澄泓坐待慙魚鳥  
聞汝空齋荷正芬有花却值無主人呼童衝曉相與致  
一朵伶俜露將墜不辭地迴近清寒且向波深作紅媚  
水仙從此住中央擁雪拋春養暗香漸喜林風翻翠蓋

俄驚山雨洗新妝  
時序舒遲夏才半  
茁茁離離踰舊觀  
從拚三月水雲中  
身墜蓮房夢淩亂  
知汝踈慵罷出門  
好乘涼月訪黃昏  
牀頭幸有多瓶在  
償取分香老瓦盆

題山前破屋

枕樓背倚山前溪  
蓬窗每啓憐溪西  
老屋三間破如此  
村農久戀成幽棲  
兒啼婦語當其下  
敗瓦殘椽莽相亞  
炊烟湧出雲無心  
天影常懸城不夜  
頻看鉏笠出復歸  
寧識全家在翠微  
眼中籬障撤都盡  
多事黃昏仍掩扉

昨宵驚龍起行雨  
馭電排風吼雷鼓  
斷岸粗能撐拄牢  
壞牆猶得存留古  
敢將結構闢新風  
月玲瓏合與鄰  
但惜中非玉川子  
茶鑪騰沸隔波聞

新蟬

泉響復禽鳴  
閒心有底驚  
午窗聞嘒嘒  
陡覺是秋聲

秋谷夜雨

幽棲清夢著烟蘿  
奈此秋宵積雨何  
豈是亂泉添響急  
非關深谷貯風多  
千峯勢極趨滄海  
三徑心期接絳河

情興尚堪衝曉在滿林飛瀑滿溪波

聞王南村於去年九月病亡

酤酒秣陵市送別春江頭題詩淚隨筆已識今生休渡  
江滯三時所至觸君迹一自掩山扉山深斷消息知君  
所居處近海越帝城帝城深於海造次誰敢行仙期俱  
渺茫魂夢各疏鈍但有舊音書那覓新聞問昨日故人  
子緘寄津門遙當食讀未半投箸驚長號言君雖得歸  
生計日已窶衰病積不支委形值秋暮含悲算歲月相

識五十年應緣夙生契肺腑久益堅出遊必逢君不限  
地近遠平生綴篇章憶贈他人罕交情會有盡從此隔  
泉扃神理如可託爲君寫道經

喜晴

一天風日送新歡報到秋霖興已闌林雀聲中雙牖朗  
瓦松花下數楹乾崢嶸澗響殘朝夢蒼翠嵐光接暮寒  
便可琴樽遲希逸同來賦月碧雲端

送仲生南歸六十韻

送別三秋遠追遊七載羸捨余非失計將父自深情江  
引迷漫夢山銜宛轉程眼者今契闊魂斷昔逢迎作客  
時踰夏論交歲在庚因依聊下榻倉猝似班荆本襲師

門舊

生幼受  
馮氏學

非尋大國盟空慙我衰朽乍喜子崢嶸載

酒籍恒醉稱詩郊善鳴伸眉得知已拂袖罷求名仕路  
虛侯喜兒婚迫向平前驅水東返後隊雁南征岱出霜  
烟聳河穿霧雪橫遙憐馳馬處獨聽刺船聲躑躅舟將  
陸逡巡雨復晴挂帆瓜步迴僦舍越來清度歲漏催燭

懷人波漾萍屋廬連浩渺姓字沒譏評有意歌招隱無  
緣訂耦耕荆蒿和斤鷄跖浪失長鯨詎料竿孤榜還能  
覓老儻荒園携手晚村塾寄身輕來往途猶濕栖遲歲  
再更石間欲移栢郭外遂遷鶯地喚金鷄館餐分玉糝  
羹攤書依桂綠把殘暎蓮頰氣味隨時澹心期向古澄  
紫霞欣可託白雪調同賡兒遣從君讀貧教與道爭見  
多憎落落友益信硜硜旅况葭蘆厭歸心澗壑縈擬邀  
張翰載好慕李膺行壯齒辭親許餘春結伴成凌風上



浮玉阻暑息蕪城巢羽寧知幕游鱗已在鰲傍人渾蟣  
蝨識客半蚊蝨滄海翻何驟流星落易驚羣言任嘲哂  
爾咏倍嘈呖往蹟撐牛斗

生有蘇揚懷  
古詩各十首

旋師捲旆旌賦

哀周庾信脫繫晉荀瑩生計從狼狽吟囊賸滿盈希賢  
才避地懷土重瞻衡晨夕聯南北薰猶愧弟兄蜂房苦  
屯聚蟻垤強經營刷石開千丈疏池貯一泓林陰披帳  
幄泉響亂竽笙室靜雲常集亭高月自呈小樓窗似柁  
欹榭樹爲楹底物堪諧俗於中合著卿清歡足圖史公

事屬杯觥佳趣兼寒暑忘機付晦明蓬蹤蛻自化塵網  
虎誰櫻境習蕭閒慣思因寤寐生每觀辭社燕屢感生  
衣螢野菊初含色靈椿正向榮行方衝落葉到及薦新  
杭暫使劍離匣永懷桃報瓊話言要的的意緒結怍怍  
地感沉三島天低礙八紘何當翹皓首相望入青冥

仲生臨發再送之

溪橋轉處即長途曉啓柴關見僕夫霜送新寒入襟袖  
人將舊夢寄菰蘆黃塵路盡波聲急紅葉庭空月影孤

若向西風問歸雁三春還憶北來無

九日仲生去後弟數人來登高適有風雨夕無  
月不盡歡而散又明日復至同飲月下

籬花入酒香初發霜樹滿山黃未勻風雨重陽元不惡  
減將秋興是行人

清池遙映酒杯空佳節雖過醉復同知我連朝無與語  
不堪獨坐月明中

送菊者數人合十餘本皆云病雨故不佳對花

獨酌輒題長句

東籬叢花綻來久掩映青黃門外柳  
惓惓客至裹巾迎  
頭上淋漓灑餘酒  
飡英豈是擬三閭  
避厄寧須卜重九  
偶然興與高秋謀  
何物堪和杯在手  
愛將佳色助清吟  
不分拘儒能藉口  
自居君子託朋儕  
富貴斤斤排向後  
雖評賢聖立等差  
儼命公侯奉圭卣  
幽人一笑返無名  
卉木緣時本芻狗  
比蒙好事致霜葩  
烘染枯寒洗塵垢  
漫云葢細葉凋殘  
入我窗扇總瓊玖  
天公晴雨自年年

舉世空勞競妍醜更呼缸面酹淵明謝去諸君吾與友

贈善釀王生

家當後樂橋歲釀范泉水壑底畢卓眠牀頭杜康祀自言收得深山春老向其中風味真雖無仙侶逡巡術合與人間麴米親我居橋東泉遶屋年年酒近重陽熟傾杯色映一池霜入口香分滿餅菊每臨虛枕飲秋晴羣季爭誇坐客驚盡道兵厨容阮尉寧知紀叟隱宣城將以醇醪畢吾世籍手相供足酣醉醉餘飛夢海山顛舉

爾蓬萊充酒吏

山莊送山藥一本大於臂重幾三斤蒸而食之  
累日乃盡

深山積歲養難成便腹連朝飽尚羸誰信酥陀天上有  
即看石髓洞中生烹煎減處知心澹餅餌拋將覺齒輕  
更爲幽叢覓花犬殘軀擬從赤松行

夜大雪口占

夢移寒林半不成宵分雪色射帷明明朝門遲知埋沒

聽徹窗前折樹聲

題十三叔佚老庵

齊年臣叔健白首嗜遺經舊著潛夫論新成陋室銘抱  
憐文若幼談許阿咸聽縹緲天文裏誰占處士星

大雪彌日子弟來共飲

昨日至城中冒雪獨來去衣衝郭外寒屐折池邊路今  
朝啓扉視荒砌積已深城中人來言門巷幾莫尋里居  
四十年不憶有此雪應緣心識清始見今奇絕園如水

面雲黏天平不動山川與城郭盡作湖濤湧千林復萬  
樹殊怪不可圖紛披珠璣珞爭聳白珊瑚對之心怡曠  
亦覺興蕭索緬想山陰人風流竟誰託何意二三子相  
攜陪醉遊茅簷晚吹發恍惚漾輕舟

晴日即目

大雪連日夜始知天地寒午晴携杖出清景不勝看山  
倚城高潔池凝徑渺漫千重氷壑底賸著一袁安

懷仙詩



冰雪覆大地思從天上臨五山將四海晃耀復森沉鶴  
翅度無影颺輪行有音猶憐壺嶠客跂足發寒吟

飲新酒戲成

戶外冰稜增刻削杯中風味足清醇不知朝暮有寒意  
所與往還惟聖人兒姪同希小阮連雲烟偏向老顛親  
醉鄉密邇何須羨欲寄和神國裏身

哭四弟稼民

歲晚荆花尚滿庭一枝帶雪忽凋零長貧浪學朱公術

久病虛參岐伯經宿世心塵誤鄉里平生手迹倦丹青  
北風送響東陵下應供殘魂怨脊令

老僧復宗來唁

山僧踏雪過山翁老病同棲隙影中說著存亡渾障礙  
只將無語破頑空

得天津書知滄洲同年劉師退健在

師退幼  
學禪觀

童稚情親五十年浮沉蹤跡兩茫然經過初見霜生鬢  
相望長如月在川貧久原思兼抱病醒多蘇晉本逃禪

海山他日期携手何必求歸兜率天

書又云王南村自知亡日沐浴具衣冠拜母無  
病而逝

迷漫欲界隔仙都老向烟霞憶舊逋贏得翛然揮手去  
得如輔嗣守門無

得仲生書及江南親友消息

懷人三月意黯黯雪送深杯欲半酣接得報書翻不樂  
重牽離緒到江南

江聲悽惻動心魂  
侍立兒童訝淚痕  
除却黃泉音響絕  
藥爐側畔有人存

鄉人苦覓余書  
猶子鉤摹一幅以給之  
余聞而

取觀戲贈二絕句  
且爲書數紙

已酉

不擬牀頭故捉刀  
那將刻鵠誠兒曹  
十年粗識蘭亭面  
偷取家雞炫羽毛

秋曉輕陰黯不開  
請君自掃小庭隈  
乍驚天外雲雷氣  
此日真龍始下來

庚戌新春遙贈舊門下士公車北上

在三往語底須論準擬登朝不負恩此去汝南門下過  
譬如今日入東門

口號

茫茫塵海沒天真虛谷無聲好問津延得希微駐靈府  
一心長作守門人

小庭栽竹比遂成林對雨題長句

王猷故是瀟灑人一日不可無此君少陵不保破茅屋

必種數竿聊免俗我從山家移竹來正當醉日劖石栽  
比年雨多易成長新梢戢戢穿簷上搖風漾月六十竿  
昔時盈尺今踰丈曉陰連山收火雲乍愛林響踈踈聞  
七賢六逸隨流水長嘯獨寒青鳳尾

阿趁週歲戲題

觀其取物  
先筆後劍

老愛佳孫子從教濶乃公齒牙冰雪凝去聲言語栗留工  
提劍非吾素抽毫有父風朝朝潁川郭抱汝著車中

壬子始春十有一日己巳夜夢與老翁對坐觀

周易遂爲余卜得同人之遯其繇則七言絕句  
也既寤惟憶首句及第二韻乃足成之

江聲海氣入詩瓢  
汨沒吟魂未易招  
夜半東風吹夢覺  
鐵船元在華山椒

春感

年光易換似流鶯  
老覺心期暗不驚  
華屋山邱等零落  
風花烟柳慣清明  
林深自許鷓鴣巢  
穩道險誰甘鼠穴爭  
却被陽城要上考  
閒閒十畝意難平

清明後大雪

泠泠鶴語遡唐堯  
卯酒微曛抵敝貂  
氷雪陡侵三月迅  
陽春恍憶十年遙  
有知社燕飛飛晚  
無幸園花灼灼凋  
借問漢廷賢丙吉  
八荒寒徧若爲調

題王臨川集

熙寧名績惠惇聯千古  
江山氣慘然玉茗堂中詞客在  
始應替得謝臨川

夢在吳門李萊蒿侍郎握別云肯思我者惟有



君耳寤而愴然遂成絕句

啼鳥喚淚落江雲斷夢分明太息聞三十年中萬賓客  
那無一箇解思君

過梁莊望澗園同二十三弟感懷之作

園已甯之俗子

矣

依舊飛梁接釣磯臨流清淚不勝揮  
高樓長閉窗三面  
新冢才營土一園  
駟僧有時喧酒炙  
兒孫無恙隔林扉  
屋廬迴與人俱換  
千歲何由待令威

弟向居他縣近始返舍

雨後即目

好風佳霽變園林耳目清新莫遠尋  
淡竹映池千點黛  
陵苔緣甍一溝金  
朱魚羣作穿荷戲時鳥偏工食甚音  
不許老夫心便死靜中牽惹發微吟

暮秋吟望

小閣高樓老一枝閒吟了不爲秋悲  
寒山常帶斜陽色  
新月偏明落葉時  
烟水極天鴻有影霜風捲地菊無姿  
二更短燭三升酒北斗低橫未擬窺

癸丑上元後病中作

老爲歡伯意躊躇  
路向窮時地有餘  
零落夢魂燈月後  
膏肓始是道人居

贈日照秦生崑雪

與其鄉人丁鶴亭李經五皆好學篤行

遠聞海上三君子  
乍可三株樹並看  
一鶴翻飛臨磻戶  
六經錯落起波瀾  
殘春羯鼓判花入  
晚道鹽車引驥難  
便合招携采芝客  
滄溟結隊理魚竿

秦生言寧海州七真人  
故居烟霞洞者中有鳥

其聲云歸山好令聞者作出世想至夜則杜鵑  
滿山悲啼不絕令人淒然腸斷道人並謂之仙  
禽余聞此語漫成口號

世人勞夢復勞形鳥語相嘲不遣停纔喚歸山又催去  
阿誰解向寂時聽

明邊華泉尚書有詩云庭際何所有有萱復有  
芋自聞秋雨聲不種芭蕉樹前人謂其意取出  
象而芋非庭中之物譏爲湊韻余則謂呼芭蕉

作樹乃鄉俗之言尤爲不典作者與譏者踈陋  
一也遂改之

庭際何所有離離花藥苗自聞秋夜雨不復種芭蕉

新秋園夜

夜氣澄來耳觀平迎秋幾許攬心情山泉林竹窗風外  
更與添將蟋蟀聲

病目自嘲

昏眸老尚曳心旌雲母屏風就裏生韋卓便應傳道術

文昌那敢競詩名信拋大地烟花色遙接高天日月明  
舊友能來慰離索醉歌猶愛有聲情

秋暑口占

甲寅

塵氛熱惱避無門短壑層冰役夢魂無語收身北窗下  
清涼元只此中存

記夢

十月十日

七十餘年不可追夢魂常與幻參差三彭昨夜故嘗我  
一豫從今當格誰眼已逢人混清白心猶和月變盈虧

分明記得崆峒語却是無知未易知



因園集卷十三



因園集跋

今年秋重謁趙秋谷夫子於因園而夫子病目彌甚不  
作詩六年矣從仲君羹梅得夫子手定平生詩藁分十  
三集假歸錄副未及校而羹梅遽索原本以去歲寒無  
事乃校一過曩夫子手書濟南竹枝及宿法慶寺二律  
皆不在蓋所刪多矣乾隆辛酉除夕前三日門人丁際  
隆謹記

因園集跋